

小方壺齋

小方壺齋

印度考略

甯波龔 柴著

緬甸之西兩藏之南有廣土突入南海形如箕古漢書謂之身毒又稱天竺六朝以後皆稱印度今有稱溫都斯坦痕都忻都者蓋同一地而譯者互異也南界海洋西跨印度河與阿富汗俾路芝接壤東西相距約五千八百餘里南北約五千餘里北枕雪山南連岡嶺中間沃野千里西北沙磧無垠氣候不齊暑寒各異北方涼燠咸宜迤南炎燠殊甚後漢始通華夏佛教之入中國實根於此唐世屢次入貢趙宋時爲回部侵割元起北方據有其地太祖征服西北印度憲宗征服中印度以宗王駙馬統之東南諸部皆聽役焉由是印度爲蒙古別部元末駙馬帖木耳王撒馬兒罕威行西域印度諸部低首稱臣愜伏恭順明嘉靖初撒馬兒罕別部莫臥爾盡奪印度地整飭紀綱力黜佛教歷十五年聲名洋溢威震天下惜諸子爭立內亂並起各部酋皆乘間自主其地印度遂分崩離析幾至不國弘治八年葡萄牙人航海至印度西境占其海口建城畫邑設埠通商利權遂爲所擅荷人忌之於嘉靖間曾以兵威開港通車如是者數十年英吉利法蘭西並起而爭遂成兩國利藪各立埠頭○國朝康熙初英人在孟加臘買地築屋建立礮臺帆檣雲集百貨流通頗有蒸蒸日上之勢乾隆二十年孟加臘酋長將英國官民盡行禁錮橫加屠戮英人銜之率勁兵進攻滅孟加臘乘勝長驅直入攻擊鄰封諸部諸部合縱禦之奈人心渙而不萃卒紛紛潰敗於是印度全境幾盡屬英其間隸入版圖者四之二三有聽其置吏徒擁地主虛名者有受其節制列入藩屬者其未經摧滅自守疆圉者惟廓爾喀暨不丹兩國然亦時遭侵削危如累卵至海口埠頭仍歸他國者爲數無幾屬法國者曰本地治里曰加黎架爾曰牙那曰商德爾那哥耳曰馬黑屬葡萄牙者曰疍磯一名俄亞曰達蒙曰的玉類惟一城一邑或受海濱一塵藉以僑寓商客堆積財貨非分裂其土壤而據之也言印度於今日不勝滄海桑田奪主誼實之慨矣

國雖全隸英人管轄而治權仍有差等其列入英籍可以省郡比擬者東爲孟加臘又作榜葛刺南爲麻打拉薩西爲孟買此三大鎮各設總鎮大臣爲之統理又立總督部院一人統領軍務大將一人議政衙門大員五六人以綜其治要皆自幼東來學習土語責以視事然後量才擢用按職遷升優給厚俸以養其操守其總督暨議政大臣孟加臘總鎮皆駐節加爾各搭城或作甲谷他爲全印度一大都會城在安額河之濱溝深濠廣雉堞崔巍國人恃爲金湯焉城內屋宇閎敞街衢矢直城外萬艘鱗集百貨薈萃繁富爲一國冠惟林菁叢雜煙瘴雨疾疫滋多安額河卽佛經所稱恆河發源雪山倒流而下高逾千仞繼自西北順流傾瀉勢頗湍急卒分數支入海每屆潦水漲發農田恆受其患土人稱爲聖江謂凡人負罪深重苟入內洗澡卽能滌去一身罪愆若爲鱷魚吞噬或將子女投之江流以飽魚腹則佛更錫之還福孟加臘所屬地廣袤數千里東南曰德那塞靈部城名馬爾大萬一作馬爾達般爲通商第一埠頭祕古部次之埠名蘭雲亦稱繁庶阿臘干部又次之東北有阿薩密部迪北之地甚瘠薄南則平衍膏腴雅魯藏布江自西藏東流折西南入境易番名蒲蘭蒲達卒會恆河以入海地本土夷部落英人旣滅孟加臘拓藏江東地據爲己有西爲巴哈爾部戶口繁密人多製硝爲業西北有小部介不丹與廓爾喀之間名哲孟雄道光三十年英人滅之隸孟加臘都城之西南爲岡都亞那部西南濱海口疇黎薩昔爲佛教最盛之地今已淹滅西北曰烏德部與廓爾喀爲鄰古稱雄國後漸衰弱以力不能敵久列英國屏藩咸豐六年竟爲英人所滅又西北有亞加拉德列等部古中印度地元世蒙古以亞加拉爲都城殿閣宏整衙署畢具城內有塔高峻絕倫陟其巔遙望可九十里城外有蒙古王冢亦作塔形週圍數十丈窮極工巧亦遊眺之區也西北本若部僻處偏隅本克什米爾迤南部落道光二十九年英人割以內附立爲副鎮會城名勞爾有電綫火車與甲谷他都城遞通消息千里咫尺最利用兵而逞志思叛者遂不復再觀

英人之勵精圖治洵可謂在遠不遺矣

麻打拉薩在孟加臘西南英屬三大鎮之一因會城得名建於沙坡之上以控制南方海濱波浪掀天夙稱奇險部名加爾那的四郊荒磧物產寥落其人賦性聰明尤工百戲迤北曰西爾加爾初本大國會力拒英人旋以弱不敵強竟遭夷滅迤西曰哥音巴都爾部礮臺最稱鞏固街衢亦平坦整潔再西曰馬拉巴爾嶺斷岡連最爲奇險係流徙罪人之所昔年諸礦咸備今惟存鐵礦數處而已再西曰加那拉部土地饒裕萬厦雲連爲印度名區此外尙多小部落未能悉數孟買在印度西境依山傍海地勢綿長前明中葉葡萄牙人始開港於此建築埠頭嘉靖八年土酋讓其全地百餘年來悉聽葡人控扼○國朝康熙初英人以兵威懾之設立總鎮督理西方城池適當衝要商賈輻輳甲谷他都城而外洵當首屈一指惜地氣淤溼瘴癘侵人人多望而生畏裹足不前南部曰北日不爾疴穢城在其境內前明正德間葡萄牙人掠其地興建堅城一時稱盛今則日漸式微氣象蕭瑟矣東北曰根的士部西北曰古塞拉德部地方數百里英據三分之一二分尙屬土酋列入藩屬再西北爲信地部地處西陲與俾路芝相接印度河貫其中發源自後藏西行繞雪山之背至印度西北始折而南會北印度諸河入海源遠流長有七千餘里印度三大河中當推第一全地亦因是得名此三大鎮之略也錫蘭島在麻打拉薩之南周圍千餘里山川秀媚花木繽紛風景之佳甲於諸郡惟濱海之地窪下卑溼時有颶風霖雨之患山多寶石隨水流下不勞披揀俗傳佛生於此居民多崇佛教明時葡萄牙人占其海口尋爲荷蘭所奪嘉慶初土酋殘虐大拂民心英人乘機進攻勢如破竹遂逐荷人據其全島今另設總督一人以資鎮守駐紮葛蘭巴城卽其都會也西望有馬威羣島地產珊瑚居民勤作類多樸愿折而北爲臘其地威羣島沙磧石田居民寥落尼姑巴羣島在孟加臘灣南與檳榔嶼相望居民不逾萬秉性怠逸初丹國據之道光二十八年讓於英

北爲安他曼羣島民居草寮食魚蠔蠻方風氣僻陋自安乾隆末年英取以內附迄今世隸版圖毋敢貳心至藩封諸國西北有克什米爾與拉達克克什米爾或作塞哥又名西刻本北印度大國近英人大舉兵戎侵略疆域過半南爲新地亞形勢曲折西陲多窮荒地又南曰尼桑幅員尙寬廣都城曰海德拉再南爲賣索爾及達拉王哥爾等部雖未納土歸降封爲郡縣然膺亡齒寒危在朝夕矣

印度人民之數綜計得二百四十兆有零地丁雜稅等銀爲數甚鉅惟兵費浩繁入不敷出入面多黧黑居北方者稍爲清皙以白布裹頭故粵東稱爲小白頭以別波斯國之大白頭也巨家額塗日光花草或點以粉額上刺紋胸臂間皆烙卦形禮所謂雕題之國始其苗裔歟衣以華麗相尙貧人則俱裸體但以幅布圍腰又自臍下紮至臀後以掩下體謂之水幔出門則幅布稍寬遇正事則穿長衣曳地男挂耳環女穿耳鼻挂金銀環臂脛俱帶釧鐲秉性靈巧百技俱工金漆雕鏤皆精絕所製玉器薄若蟬翼國人分四類一婆羅門學士及僧眾所從出二曰王孫貴族世世從軍三曰農爲商爲兵聽其自便四曰工終身傭力受役於人凡此四等皆各守世業不得互相交接更不得聯秦晉之好違之者父母惡親戚疏眾民絕等諸罷民終身不齒以謂負本忘宗辱莫甚也以故貴者世貴賤者世賤賤者死多有棄諸水而葬於魚腹更有婦人伉儷情篤以身殉夫者夫既死積薪於野置屍其上舉烈火焚之婦則盡戴所有金銀珠寶繞火大哭親戚亦隨之哭見屍將化婦盡撤諸寶飾分贈親族及生平所與厚者乃躍入火中殉之誠陋俗也印度爲佛教所宗今中國僧人袈裟與合掌膜拜之禮悉爲印度土俗然自回教起於唐世由天方漸侵東北印度雖尙佛法亦半舍牟尼而拜摹罕厥後天主教各處廣傳馴至今日已積兆有八千萬人若英教火教等從者甚鮮物產五穀棉花鴉片金鋼鑽黃金寶石瑪瑙明珠珊瑚香水海味等物獅象虎豹毒蛇猛獸成羣走壙無敢或殺且或敬之數年前有好事者統計其數得一萬九千六百有奇民間

因傷致斃者得二萬人其他家禽馴獸如馬牛羊等爲其吞噬傷斃者五萬三千有奇

印度志略

印度在英一統之間自極南哥摩令角至極北比沙烏耳約六千五百里自加拉氣西至素地牙東約五千里全地方里約計一京三兆二萬人民二孩八京其全地五分之二本部落自爲主惟首領屬英略服其政權其部落一百四十有八五分之三卽英一統之地分列九省一孟加拉二西北諸部三本若比四烏德五中部六英緬甸七亞桑八麻打拉薩九孟買是已

溯周時歐羅巴馬基頓王亞力山德起兵攻擊印度至宋眞宗時有麥慕德始建國於此篤守回教撤去印度梵教民怨懟不盡五百年後其歷王讓蒙古人爲皇者名巴伯彼孫子亞喀巴幾勝印度全地分列十八部各設總督明成化十三年葡萄牙人由海入印度兵權甚偉兼圖貿易萬厯二年屬荷蘭隆慶三十年英公司開於市井之地與本部屢攻日漸興盛得其土地間有法蘭西人相爭至清咸豐八年有數萬人民作亂英兵屢攻撲滅此時公司廢弛以英國政爲主大員駐劄倫敦者十五人集議會政事悉屬焉又在加爾各塔設總督駐劄議會五人又有大將軍統轄諸政分列六部一司賦稅一司內政一司外政一司兵事一司工事一司農商諸政

同治十三年核計存庫銀約一孩九京支用約二孩一京支浮於存其數不敷九省分墊以補不足孟加拉咸豐三年前總督管理後設巡撫其民務農者三分之二回教三分之一鴉片稅銀每年二千萬兩有奇土產洋藍五穀鴉片等物方里一兆七億八萬大憲十缺牧令四十七缺人民六京五兆每年稅餉六京支款二京出貨九京八兆入貨六京二兆土城加爾各搭人民四億四萬

西北諸部設巡撫統轄其人民中有二京六兆從梵教者方里七億三萬大憲八缺牧令三十六缺人民三京有奇每年稅餉二京三兆土城名阿拉哈巴每年支款八兆奇

本若比設巡撫統轄中有本地部落三十四人民五兆每年稅餉六兆四億兵丁五萬此外交界處兵丁十三萬方里九億三萬大憲十缺牧令三十二缺人民一京八兆稅餉一京九兆四億支款六兆三億土城拉和耳

烏德地方官吏虐民咸豐六年英國總督收其地方里二億大憲四缺牧令十二缺人民一京二兆稅餉六兆支用二兆五億土城廬各腦

中部中有本地部落十五方里二億六萬其全體方里七億五萬大憲四缺牧令十九缺人民八兆二億餉稅六兆支款二兆奇土城各那哥不爾

英緬甸其地狹隘褊小在孟加拉海灣之東道光六年英與緬甸攻鬪收屬兩部咸豐二年又收屬一部方里八億大憲三缺牧令十五缺人民二兆稅餉五兆支款二兆七億出貨一垓五京入貨亦六兆七億土城郎昆

亞桑道光六年始屬英同治十三年歸孟加拉巡撫統轄設有佐理道後分其部落地產茶前四年出茶

八兆六億斤方里四億七萬大憲一缺牧令十一缺人民二兆九億二萬土城哥亞巴拉
麻打拉薩法屬地本地治里在此省之中嘉慶六年猶是彈丸之區後漸昌熾設巡撫並佐理者二人行律法議會方里一兆三億大憲三缺牧令二十一缺人民三京二兆稅餉三京三兆用款二京四兆出貨

二京五兆入貨一京二兆土城麻打拉薩人民四億

孟買計長四千有奇里其民從印度梵教者十之七分六回教者十之一分七每年海市貿易興旺英一統之中倫敦以外居民最多設巡撫統轄議會者三人行律法議會方里屬英者一兆二億大憲三缺牧令二十三缺人民一京七兆本部方里六億稅餉三京八兆支款二京九兆出貨七京九兆本部二億入

貨四京本部一兆二億土城孟買人民六億五萬

以上九省共有稅餉一垓九京其數足以籌國用而立善政其大似除俄羅斯以外之歐羅巴其民約二垓八京所屬之部如賣索耳比辣爾政令如英不輸國庫海德拉巴拉智普大那與中地諸部等

賣索耳平原方里二億四萬三千道光十五年英收此部以免本地首領暴虐其民今首領年輕英官長司教訓等事預備其後日嗣職

比辣爾咸豐三年屬英方里一億六萬地產木棉既繁且佳

海德拉巴方里七億二萬本國自立之部最大首領幼不能蒞治大員攝政英官長亦協力相助

拉智普大那南北一千五百餘里東西一千八百里方里一兆一億人民八兆五億分列十八牧令有英大憲統轄佐治者二十二八兵丁約七萬中地諸部方里共七億七萬分列七十一部亦有英大憲治理焉

印度稅餉最重者米鹽鴉片孟加拉產鴉片尤佳英官專司之如有種者收時當歸英官悉照定價孟買鴉片產於本部內移至英界即納重稅內地貿易最大除銀錢以外價值由海而入者共四垓六京其出印度至中華四京六兆十分中鴉片居其九印度負債約四垓獲利一京八兆開造鐵路約二萬三千里費銀四垓五兆每年收銀一京五兆電綫各處舉行便於迅速外有信局每年除新聞紙外書信往來有六京五兆兵丁一億九萬其糧口約六京英兵丁減半添設巡捕亦如其數

學塾自緬甸本部外有四萬七百處肄業者約一兆二億八萬每年用款皆出於官員捐助約三兆三萬有奇其授學由蠡及精由小及大各種莫不美備設立學院所考本地方言英國諸書及古文等皆已繙譯並習英語女生亦夥每省有一學官亦有佐理者近英君主新令頒示在英則稱君主在印度則稱皇

帝

五印度論

五臺徐繼畲著

五印度在亞細亞一土正當午位北面雪山綿亘南境斗入溟渤袤延蓋萬餘里漢武帝欲由身毒通大夏斷匈奴右臂西南夷之役由此而興然單車之使卒未能渡恆河即安而西發東漢時顯宗求佛法始遣一使由是漸通朝貢唐代往來尤頻數北宋時亦屢來貢獻元太祖起於漠北未創金源先開西土由印度之西北轉戰而南憲宗繼之五印度遂全歸囊括互古蠻荒之域使以鞭筆顏行莫逆功烈可謂奇矣惜乎有其土莫能變其俗宗王國威遠受蠻封魑髻箕踞翬化自泰迨元政既衰聲靈隔絕諸部之酋雖強半蒙古苗裔而與昔日之蠻荒亦無大區別也歐羅巴諸國之居印度始於前明中葉倡之者葡萄牙繼之者荷蘭佛郎西英吉利皆以重貲購其海濱片土營立埠頭蠻人憤憤不察萌芽英吉利漸於各海口建立礮臺調設兵戍養銳蓄謀待時而動迨孟加拉一發難端遂以全力進攻諸蠻部連雞棲桀等於拉朽折枯於是五印度諸部夷滅者十八九哀哉英人自得五印度權稅養兵日益富強其陸地與西藏之南界滇省之西界雖壤地幾於相接而梯度繩懸往來不易水程則自孟加拉至粵東兼旬可達邇年英人貨船自印度來者十之六七昔日之五印度求疏通而不得今日之五印度求隔絕而不能時勢之變固非意料所及矣

英吉利印度埠頭孟加拉最盛孟買次之麻打拉薩又次之英吉利本國商船與歐羅巴諸國之船每歲往來以數千百計其稅銀每歲得千餘萬養兵太多支銷之外所餘亦無幾

中國之布從前皆以麻織自元太祖征印度乃得棉花之種

棉花初稱吉貝

流傳中土至今衣被九州功駕桑麻

之上其利溥矣乃鴉片之毒亦出於此五印度諸部皆產此物而最多者爲馬刺他

川南滇西地近印度故亦有栽種爲粟者

鴉片分兩種成團者爲大土其價昂聚於孟加拉麻打拉薩成片者爲小土其價廉聚於孟買五印度貨

物惟棉花鴉片最多近年竟以鴉片爲主每歲出運數萬餘箱宇宙浮孽之氣乃獨鍾於佛國何其怪也回疆葉爾羌等城時有克什米爾溫都斯坦兩處之人往來貿易七椿園謂兩部皆回部大國由葉爾羌南行六十餘程至克什米爾又四十餘程至溫都斯坦以今考之克什米爾卽塞哥爲北印度大國溫都斯坦則五印度總名部落旣多西域不能辨識自克什米爾之外概稱爲溫都斯坦耳又云兩廣福建之物往往由溫都斯坦販至回疆此無足怪溫都斯坦之孟加拉孟買皆英吉利大埠頭閩粵之貨山積由兩處至回疆皆商賈通行之熟路轉運固甚便矣

印度爲佛教所從出晉法顯北魏惠生唐元奘皆遍歷其地訪求戒律大乘要典紀載特詳其所謂恆河者卽今之安額河印度人稱爲靈水諸佛菩薩羅漢繪塑之像多裸上體或耳帶環脛束釧乃印度本俗至今未改所衣袈裟卽印度人外著之沙耶僧人爲禮合掌膜拜亦皆印度土俗也佛法自後漢入中國至南北朝而達摩航海東來演教外別傳縑流遂布滿中國紅衣喇嘛教起於烏斯藏其地本毗連印度至前明中葉宗喀巴別唱宗風演爲黃教內外蒙古暨瓦剌各部靡然從風其教可謂盛矣然自回教興於唐初由天方漸傳東北不特玉門以西多花門種類而佛法最盛之五印度亦大半舍牟尼而拜派罕派罕巴爾卽摩哈麥回教之祖也元起北方最崇佛教太祖憲宗取印度建爲外藩乃其地已半從回教不特不能改革而蒙古居其地者亦改從回教蓋自宋元以後五印度佛教已不如回教之多至今日而印度各國備歐羅巴之東藩又參以西教而佛教愈微矣慧光照於震旦而淨土轉滋他族物莫能兩大想佛力亦無如之何邪

印度人容貌壯偉氣象溫和好文學者往往傳梵字書議論高妙尊信婆羅門教愚民或輾死靈車下或以子女爲犧牲人死則棄諸水以飽魚鼈有伉儷敦篤者積薪焚夫屍跳入火中人民分四族貴族不得與平人婚犯者處刑貧者平居裸體以寸布圍腰下居屋塗以牛糞男子胸烙小印額上刺紋女人穿鼻帶環中國人以爲五印度並奉佛教是大誤然佛書稱恆河爲靈水卽今安額河諸佛菩薩羅漢繪塑之像多裸上體或耳上帶環脛束釧卽印度本俗僧服袈裟及合掌膜拜亦皆印度土俗也則以其地爲佛教所從出不足深怪也自達摩航海入中國佛教大行於東洋諸國紅衣喇嘛教起於烏斯藏後宗喀巴別倡黃教蒙古諸國靡然從之可謂盛矣然自四教起其教漸傳東北而錫蘭亦多舍佛教而拜馬哈麥者至今五印度爲歐羅巴之東藩參以西教而佛教漸微矣

印度紀遊

泰西堅彌地著

印度之南有地名豪棣者其都會之區曰花利泰遠近所稱爲聖地者也附近爲通商口岸樓閣宏麗街衢潔淨貿易場中甚爲暢旺於險要處築有礮臺旣堅且固備擅形勢足資守禦廟宇寺觀妙處尤多極其清靜曩者曾由火船道經其地停泊兩天然後啓行遂得徧遊其境偶入古剎地勢廣闊寺後隙處有塔矗然碑碣林立凡釋迦之徒多葬於此余以殯葬之法詢諸寺眾據稱頗爲奇詭因欲覓隧道入而觀焉久不可得遇一老僧鬚髯長堪過腹頂上圓光望而知爲有道者身衣紫色僧衣腰束一帶徒步而來雙眸炯炯乍開乍合手持鉅燭並鎖匙笑語相迎聽之殊不通曉細忖其意似知我欲覓門入塔故來作先路之導也因把袂偕行入一山洞穿過小園瞥見石扉雙肩僧乃持鑰啓門令余入內復閉其門而秉燭引到一處手指口授余會其意細爲觀察見有大穴乃鑿壁而成者狀如神龕中儲一屍直立不仆乃其葬法也再行數武環視間見數十屍皆同一式腰下各有一木欄之使不傾仆也聞皆是古時有德行之人死而葬於此者屍上則書有本人姓名及畫有卦象觀畢乃登樓眺望覺地幽境雅真爲世所罕有所植花草果木色香俱備以火船行期在即不敢久留乃別僧回船然至今猶時縈於心目中每一憶及則如身遊其境云